



### Headlines

- केंद्री खजना मंत्री निर्मला सीता रमण होंरें 2024-25 बरे लेई केंद्री बजट पेश कीता। 48 लकख करोड़ रपे दे इस बजट च कम्म रोजगार ते नौकरियां बधाने लेई कंपनिएं गी प्रोत्साहन देने बक्खी ध्यान दित्ता गेदा ऐ।
- बजट च परानी टैक्स बवस्था च कोई बदलाव नेई। नमीं टैक्स रजीम च 3 लकख रपे तोड़ी दी औंदन पर कोई टैक्स नेई।
- जम्मू-कश्मीर लेई बजट च 42 ज्हार 277 करोड़ 74 लकख रपे बक्ख रक्खे गे'न जेहड़ा पिच्छले बजट कोलां मसां कोई 1 इशारिया 2 प्रतिशत मता ऐ।
- प्रधानमंत्री नरेंद्र मोदी होंरें आखेआ ऐ जे 2024-25 दा बजट समाज दे हर इक्क वर्ग दे सशक्तिकरण च मददगार साबत होग।



### Budget-2024

केंद्री खजना मंत्री निर्मला सीतारमण होंरें अज्ज लोकसभा च 2024-25 बरे दा आम बजट पेश कीता जेहड़ा प्रधानमंत्री नरेंद्र मोदी सरकार दे त्रीए कार्यकाल दा पैहला बजट ऐ। इस मौके खजाना मंत्री होंरें आखेआ जे भारतीय अर्थ बवस्था नै केई कुल संसारी चुनौतिएं दे बावजूद अपनी चमक बरकरार रक्खी ऐ ते औने आहले बरें च एहू इस्सै चाल्ली दुनिया दी सब्बनें शा तेजिया कन्नै बरोस करने आली अर्थ बवस्था बनी दी रौहग। अपने बजट भाषण च खजाना मंत्री होंरें आखेआ जे एहूदे च हुनर सिखलाई कार्यक्रम ते औद्योगिक सिखलाई संस्थानें बक्खी विशेष ध्यान दित्ता गेदा ऐ तां जे कम्म-रोजगार दे मते मौके पैदा कीते जाई सकन। अज्ज बडुलै लोकसभा च उनें 2024-25 बरे लेई 48 लकख करोड़ रपे कोला मते दा बजट पेश कीता। सरकार नै कम्म रोजगार ते नौकरियां बधाने लेई कंपनिएं गी प्रोत्साहन देने दा ऐलान कीता ऐ। इक करोड़ गरीब परिवारें गी घर बनाइए देने दा बी वायदा कीता गेआ ऐ। इंकम टैक्स गी लेइयै बी सरकारै बडुी घोषणा कीती ऐ। नमीं टैक्स रजीम यानि टैक्स भरने दी नमीं बवस्था च जित्थे बदलाव कीता गेआ ऐ उत्थे गै परानी आली बवस्था गी उसै चाल्ली रक्खेआ ऐ। नमीं टैक्स बवस्था च 3 लकख रपें तगर दी औंदन पर कोई टैक्स नेई होग। 3 लकख कोलां 7 लकख पर 5 प्रतिशत, 7 कोलां 10 लकख पर 10 प्रतिशत, 10 कोलां 12 लकख पर 15 प्रतिशत ते 12 कोलां 15 लकख रपे दी औने पर 20 प्रतिशत टैक्स लगगोग। जिसले जे 15 लकख कोलां मती दी सलाना औंदन पर टैक्स दी दर 30 रक्खी गेई ऐ। स्टैंडर्ड डिडक्शन दी हद्द 50 ज्हार रपे कोलां बधाइयै 75 ज्हार रपे कीती गेई ऐ। इस बजट च 2024-25 च राई-बाई ते औदे कन्नै जुडे दे सैक्टर लेई 1 लकख 52 करोड़ रपे दी रकम बक्ख रक्खी गेई ऐ। कुदरती खेती पर जोर दिंदे होई ऐलान कीता गेआ ऐ जे दऊं बरें च 1 करोड़ करसानें गी मदद दित्ती जाग तां जे पारंपरिक ते कुदरती तरीकें कन्नै खेतीबाड़ी गी बढावा थहोई सकै। सस्ती दरें पर

लोन थोई सकै, एहदे लेई सूद सब्सिडी बी शुरू कीती जाग। महिलाएं ते बच्चिएं गी लाहू पुजाने आली योजनाएं लेई 3 लख करोड़ रपे जारी करने दी घोषणा कीती गई ऐ। कम्मकाजी महिलाएं लेई वुमन हास्टल बनाए जाडन। Hostel ते Crech दी सुविधा कन्नै कम्म करने आले च महिलाएं दी भलाई बध्वाई जाग। नमें मलाजमें लेई बी इक स्कीम शुरू कीती गई ऐ जेदे नै 2 करोड़ 10 लख नौजवानें गी लाहू हासल होग। एहदे तैहत सरकार नमें मलाजमें दी पैहल तनखाह दे बरोबर रकम जेहदी बद्दोबद्द 15 ज्हार रपे होग, इसी त्रऊं किश्तें च सिद्दे उस मलाजम दे खाते च जमा कराई दिती जाग।

<><><><><><>

### **Budget-Custom Duty**

सरकारै बजट च 25 जरूरी खनिजें गी सीमा शुल्क सोयां पूरी चाल्ली छूट देने ते 2 खनिजें पर बीडीसी गी घट्ट करने दा प्रस्ताव दिता ऐ। एहदे कन्नै ऐसे खनिजें दे प्रसंस्करण ते शुद्धिकरण गी बड्डे पैमाने पर बढ्वावा थ्होग ते रणनीतिक ते महत्वपूर्ण क्षेत्रें आस्तै इनें खनिजें दी उपलब्धता यकीनी करने च मदद थ्होग। वित्त मंत्री होरें आखेआ जे सुन्ने ते चांदी दे गैहनें पर सीमा शुल्क गी घटाइए 6 फीसद करने ते प्लेटिनम पर सीमा शुल्क गी घटाइए 6 अशारिया 4 फीसद करने दा प्रस्ताव दिता ऐ।

<><><><><><>

### **Budget-PMAY**

वित्त मंत्री होरें घरें-मकानें सरबंधी सैक्टर च बी केई सारे प्रस्तावें दी घोषणा कीती ऐ। उनें प्रधानमंत्री आवास योजना दे तैहत ग्रामीण ते शैहरी क्षेत्र च त्रै करोड़ बाद्दू मकानें दी घोषणा कीती ऐ जेदे आस्तै लोडचदा आवंटन कीता जा' रदा ऐ। वित्त मंत्री होरें आखेआ जे पी.एम आवास योजना शैहरी दे दुए चरण च सरकार शैहर च रौहने आहले गरीब ते दरम्याने दर्जे दे इक करोड़ दी जरूरतें गी पूरा करने लेई 10 लख करोड़ रपे दा निवेश करोग।

<><><><><><>

### **Budget-JK**

अज्ज पेश कीते गेदे केंद्री बजट च जम्मू-कश्मीर गी 42 ज्हार 277 करोड़ 74 लख रपे दी रकम अलाट कीती गई ऐ जेहडी जे पिछले बरे दिते गेदे 41 ज्हार 751 करोड़ 44 लख रपे दे बजट कोलां शडा 1 इशारिया 2 प्रतिशत गै मता ऐ। जम्मू-कश्मीर च संसाधनें दी कमी दी कसर गी पूरा करने लेई केंद्र शासित प्रदेश गी केंद्री सहायता दे रूपै च 40 ज्हार 619 करोड़ 30 लख रपे दी रकम दिती गई ऐ। जम्मू-कश्मीर गी मुख बजट दे अलावा जम्मू-कश्मीर पुलस लेई 9 ज्हार 789 करोड़ 42 लख रपे दी बक्खरी रकम बी दिती गई ऐ। प्रतिक्रिया दिंदे होई आम लोकें गलाया।

<><><><><><>

### **PM-Budget**

प्रधानमंत्री नरेंद्र मोदी होरें आखेआ जे केंद्री बजट 2024-25 कन्नै समाज दे हर वर्ग गी मदद थ्होग ते उंदा सशक्तिकरण होग। उनें जोर देइए आखेआ जे इस बजट कन्नै ग्रं, कमजोर वर्ग ते करसान समृद्धि आली भेठा अग्गे

बदलना। इक वीडियो सनेह च प्रधानमंत्री होरें आखेआ जे इस बजट कन्नै युवाएं गी मौका थहोग। उनें आखेआ जे पिच्छले 10 बरें च 25 करोड़ लोक गरीबी थवां बाहर आए न।

<><><><><><>

## **Budget-Reaction NDA**

तेलगु देशम पार्टी दे नेता ते सिविल हवाबाजी सरबंधी मंत्री किंजारापू राम मोहन नायडू होरें केंद्री बजट दी सराहना करदे होई आखेआ जे आंध्र प्रदेश ते पोला वरम परियोजना दे विकास आस्तै महत्वपूर्ण प्रावधानें दी घोषणा कीती गई ऐ। बजट मगरा संसद भवन परिसर च मीडिया कन्नै गल्लबात च उनें आखेआ जे पोलावरम परियोजना राज्य दे लोकें द जीवन रेखा ऐ। पार्लियामानी मामलें दे मंत्री किरण रिजिजू होरें केंद्रीय बजट गी सारे नागरिकें आस्तै सुखने दा बजट करार दित्ता। मीडिया कन्नै गल्ल करदे होई रिजिजू होरें आखेआ जे एहू विकास केंद्रित बजट ऐ जेदे च समाज दे सारे वर्गें दा ध्यान रक्खेआ गोआ ऐ। उनें आखेआ जे केंद्रीय वित्त मंत्री निर्मला सीतामरण होरें पूर्वोत्तर क्षेत्र च बैंकिंग सेवाएं दी पुज्ज बदाने आस्तै केई घोषणा कीतियां गेइयां न। केंद्री मंत्री होरें आखेआ जे पूरे मुख्य च पी.एम आवास योजना तैहत 3 करोड़ घर बनाए जाने दा फैसला ऐतिहासिक ऐ। भारतीय जनता पार्टी दे नेता रवि शंकर प्रसाद होरें केंद्रीय बजट दी सराहना करदे होई आखेआ जे रोजगार दे मौके बदाने कन्नै केई होर महत्वपूर्ण घोषणा कीतियां गेइयां। केंद्री मंत्री ते जे.यू.डी नेता राजीव रंजन सिंह होरें बजट दा सौआगत कीता।

<><><><><><>

## **Opposition-Budget**

कांग्रेस नै बजट दी निन्देआ करदे होई आखेआ जे एहूदे च आमदन सरबंधी फर्कोफर्की गी दूर करने लेई किश बी नेई कीता गोआ। संसद दे बाहरें मीडिया कन्नै गल्ल करदे होई कांग्रेस नेता शशि थरूर होरें आखेआ जे बजट च मनरेगा दा कोई जिक्र नेई ऐ। हालांकि उनें बजट सोयां एंजल टैक्स हटाए जाने दा सौआगत कीता। समाजवादी पार्टी प्रमुख अखिलेश यादव होरें बी बजट दी नुक्ताचीनी कीती। उनें आखेआ जे एहू महंगाई ते बेरोजगारी दे मुद्दें गी हल करने च विफल ऐ ते एहूदे च करसानें आस्तै कोई ठोस योजना नेई ऐ। यादव होरें आखेआ जे जिलसे तगर करसानें दी समस्याएं दा हल नेई हुंदा ते युवाएं आस्तै रोजगार यकीनी नेई बनदा, उसले तगर जनता गी कोई लाहू नेई होग। शिव सेना नेता प्रियंका चतुर्वेदी होरें आखेआ जे बजट च महाराष्ट्र आस्तै किश बी नेई ऐ। उनें आखेआ जे करसानें आस्तै बी कोई राहत नेई ऐ। उनें गलाया जे एहू घट्टोघट्ट समर्थन मुल्ल ते दौहार-कर्जे सने करसानें दी कुसै बी समस्या दा हल नेई करदा। डी.एम.के नेता टी.आर बालू ते तृणमूल कांग्रेस दे कल्याण बनर्जी होरें बी केंद्रीय बजट दी आलोचना कीती।

<><><><><><>

## **CII-Budget**

भारतीय उद्योग परिसंघ दे अध्यक्ष संजीव पुरी होरें केंद्री बजट 2024-25 गी विकास आधारित बजट दस्सेया। नमीं दिल्ली च संवाददाताएं कन्नै गल्ल करदे होई पुरी होरें आखेआ जे एहू बजट अर्थ बवस्था दे बाद्दे गी गति देग। उनें आखेआ जे बजट च लौहके, भलेयां लौहके ते दरम्याने दर्जे दे उद्यमें, राई-बाई, बुनियादी ढांचे, कौशल, टेक्नोलाजी, नमिएं काहडें सने बक्ख-बक्ख क्षेत्रें दा ध्यान रक्खेआ गोआ ऐ।

<><><><><><>

## **Assocham-Budget**

एसोचैम दे महासचिव दीपक सूद होरें केंद्रीय बजट गी संतुलित बजट दस्सेया। आकाशवाणी समाचार कन्नै गल्ल करदे होई उनें आखेआ जे बजट विकास मुजब ऐ ते एहू विकसित भारत दे लक्ष्य गी हासिल करने च मदद करोग।

<><><><><><>

### **Budget-FICCI**

उद्योग जगत आस्सेआ केंद्री बजट 2024-25 दा सौआगत कीता गेआ। .. दे अध्यक्ष अनीश शाह होरें मीडिया कन्नै नमीं दिल्ली च गल्ल करदे होई बजट दी सराहना कीती। उनें आखेआ जे एहू बजट विकास गी बढावा देने आला ऐ जेडा युवा, महिलाएं ते करसानें सनें केई क्षेत्रें पर केंद्रित ऐ। उनें आखेआ जे सुन्ने, चांदी ते प्लेटिनम पर सीमा शुल्क घट्ट कीता गेआ ऐ। उनें सरकार दे फैसले दा सौआगत कीता।

<><><><><><>